

戲

瑕

戲瑕第二

甄鬲錢希言譔

新野馬之駿校

吳荀愛奇

按吳均續齊諧記略云陽羨許彥山行遇
一書生臥側云脚痛求寄鵝籠中彥以爲
戲言書生便入籠籠亦不更廣書生亦不
覺小宛然與雙鵝並坐鵝亦不驚彥負行
而去都不覺重前行息樹下書生乃出籠

語彥曰欲爲君薄設彥曰善乃口中吐出一銅奩子具諸餽饌珍羞方丈又於口中吐出一女子共坐宴俄而書生醉臥女子於口中吐出一男子書生臥欲覺女子於口中吐錦行障遮書生書生乃留女子共臥男子又於口中吐一婦人共酌戲談甚久聞書生動聲因取所吐婦人還納口中須臾書生處女乃出吞向男子獨坐然後書生

起遂吞其女子諸器皿悉內口中留大銅盤可二尺廣與許彥別又案荀氏靈鬼志略云太元中有道人從外國來多有術法常行見一人擔擔上有小籠子可受斗餘語擔人云吾步疲極欲暫寄居擔人甚怪之慮是狂人便語君欲何許自居耶荅云君若見許正欲入居此籠子中擔人愈怪其奇君能入籠中便是神人也即入籠中

籠亦不更大擔亦不覺重又按舊雜譬喻
經略云國王太子入山上樹逢見梵志獨
行入水池浴出已飯食作術吐出一壺壺
中有女與屏處室梵志得臥女子復吐一
壺壺中有男復與其臥已吞壺須臾之
頃梵志起已復納婦着壺中吞已杖持而
去太子歸國白王請梵志及諸臣下作三
人食持着一邊梵志旣至言我獨自太子

曰梵志汝當出婦共食梵志不得已出婦
太子語婦汝當出夫共食如是至三不得
已出男共食食已便去據三說奇而又奇
抑何相類若此也余意當時先有此經吳
荀二家愛奇之甚故竊取經語而傳會成
篇以文爲戲耳不然者豈有偶合之理

陸終氏

卷章取程冰氏曰嬌

班固古今人表曰嬌極

生吳回

食於吳故吳回生陸終楚極司馬氏皆陸終之後不憚錢氏

陸終取鬼方氏曰嬪音削人表麗三年生

子六人曰樊曰惠連曰錢曰求言曰晏安

曰季連以六月六日坼左而三人生剖右

而三人出錢之字鏗封於彭是爲太彭錢

乃古翦字耳秀堅諸稽伯今人疑釋典中

有坼左剖右之說輒指爲誕妄豈未考之

遷古乎

說苑學孟子

說苑景差相鄭鄭人有冬涉水者出而脛
寒後景差過之下陪乘而載之覆以上袵
晉叔向聞之曰景子爲人國相豈不固哉
吾聞良吏居之三月而溝渠修十月而津
梁成六畜且不濡足而况人乎此段全學
孟子子產聽鄭國之政一章不然何其事
之連類若此又景公探爵斂一段亦學孟

子牽牛過堂下一章而晏子治東阿則祖
襲齊威王烹阿封即墨議論以成文言雖
誣而中理可觀漢人高手

鼎中錢

漢有當三錢至宋文帝二十四年六月以
貨貴鑄大錢一當兩二十五年正月己卯
罷大錢當兩梁太平二年夏四月己卯鑄
四柱錢一准二十壬辰改四柱錢一准十

案崔鴻後趙錄載石勒時得一鼎容四寸
中有大錢三十文曰一當百百當千千當
萬鼎銘十三字篆書不可曉藏之於永豐
倉此事甚奇考諸三國時錢法劉備以一
當百孫權以百當千則鼎中錢是蜀吳所
遺未可知也乃泉譜直載僞趙錢千當萬
萬當千止有三豈即鼎中三十之異而傳
訛傳會未之深考耶

曾參無沒水事

韓詩外傳稱曾參親刲之後南游於楚得尊官焉堂高九尺轉轂百乘北向而泣涕者悲不逮吾親也初未嘗言沒水事而論語載臨深履薄之誠檀弓亦載命曾元易簣一段鑿鑿可據乃南齊秀才劉璡者上書有云臣聞曾子孝於其親而沒於水此說出何典記甚哉平文人之好訛也

曹景宗

曹景宗出行塞車幔帷曰昔在鄉里騎快
馬如龍拓弓弦作霹靂聲箭如餓鴟叫耳
後風生鼻頭火出今來揚州作貴人閑置
車中如三日新婦邑邑使人氣盡此五十五
字大有致殊不似長鎗大刀語而後世
但傳競病二韻爲佳競病詩只是操筆立
成驚倒光華殿中客耳以爲足概英雄之

思淺哉

家禮

世傳文公家禮最宜依行今俗冠禮廢
亾論矣至婚喪祭三者禮莫大焉全不依
禮競侈虛文殊於古義有傷甚至婚家禮
書式樣載在禮中曾不經目漫以俳偶之
語相誇徒爲金箋災耳天闕剝藤可悲可
弔所當改正

古人姓名

韓馮一稱韓朋馮驩一稱馮煖尚平一稱
向平荀卿一稱孫卿匡俗一稱廬俗馮婦
韓娥徐夫人丁夫人翠鴛鴦陳意奴趙燕
奴皆男子也而或疑爲婦人許負曹豐生
劉賢得王聖陳君夫王伯榮關別駕皆婦
人也而或疑爲男子龍陽君本美男子也
而名疑謂魏安釐王幸姬彌龍陽君鄭櫻

唐書卷一百一十五
列傳第五十五
桃石廟后名晉元從僕射鄭世達家城也
而載記謂廟寵惑優童鄭櫻桃譖殺郭
二氏班孟石公子范成君楊正見並其
也而其名像男子柳條青三朶花婆娑
感庭秋並仙人也而其名像女真梁鴻之
有孟充稱令妻矣而蜀志亦有男子孟充
元魏之臣李平稱名將矣而漢宮亦有嬖
奸李平離騷之載巫咸稱楚臣矣而漢武

帝時亦有仙人巫咸漢高祖時有韓信而
同時馬邑之圍降於匈奴者亦韓信事夏
爲宗伯者鬻熊而著書二十二篇周赧王
爲楚祖者亦鬻熊苻堅時有王猛而齊侯
伐晉與東郭書讓登夷儀城者亦王猛後
蠡變姓名爲賜夷子皮而田成子之臣曾
夜告田成子爲旌節以起卒我之伐齊遂
殘之者亦賜夷子皮七月七日冠遠海冠

朱衣虎頭鞶囊五色綬帶劍過蔡經家者
是仙人王方平而性好山水愛宅蘭風垂
釣於上虞江者又一王方平也貞觀中勅
文武官各貢理國之策馬周所貢意出入
表自此累居大任入相中書者是仙官馬
周而斗酒濯足於新豐市上酒家者又一
馬周也賜真朮修服坐知四方之事乃入
上疆洞中者是中山劉商而與賣藥道士

携手登揚州酒樓者又一劉商也學識好
古有名於時爲成都少尹者是太和中李
章武而與逆旅主人婦死後交合解贈西
王母所遺鞦韆寶者又一李章武也世喜
傳訛稱謂易亂苟非辨證將安所適從哉

目送

目送飛鴻手揮五絃此晉嵇叔夜五言詩
也唐人獨孤及馬退山茅亭記中改作手

彈絲桐曰送還雲直用其義不覺蹈襲權
德與吳興溪亭記則曰曰送飛鳥口吟招
隱抑又下矣然曰送二字實有本左傳宋
華督見孔父之妻曰逆而送之曰美而艷
呂覽客有見田駢者趨翔閎雅辭令遜敏
曰駢送之以目漢高曰送四皓孝文曰送
絳侯而東漢靈帝曰送田鳳題柱曰堂堂
乎張京兆田郎

碧油幢

幢櫺幢其狀童童然也一作幘帷或云車
幘唐張仲素塞下曲中獵馬千羣雁幾雙
燕然山下碧油幢傳聲漢北單于破火照
旌旗夜受降是以油幢爲軍旅中威儀矣
惟白居易有婦兄楊汝士領東川節度使
與妻崔氏同赴任樂天代內作詩送之云
劉綱與婦共升仙弄玉隨夫亦上天何似

沙哥與崔嫂碧油幢引過東川用事切當
蓋沙哥汝士小字也

多羅

唐顧甄遠賦惆悵詩中有若爲多羅年少
死始甘人道有風情二句湯義仍常不解
多羅之義而以質余余無以應近見一書
云多羅粉器也疑唐人直以多羅爲粉而
稱粉少年耳又多羅海外國名見山海經

弄參軍

肅宗讌於宮中女優弄假戲有綠衣秉簡
爲參軍者天寶末蕃將阿布恩伏法其妻
配掖庭因隸樂工令爲參軍之戲公主諫
以爲不可遂罷戲而免阿布恩之妻此因
話錄所載甚詳故唐人薛能有詩此日楊
花飛似雪女兒絃管弄參軍可證女優粧
束矣乃陶宗儀撰輟畊錄直以參軍爲後

世副淨據云開元中黃幡綽張野狐善弄
叅軍然則戲中孤酸皆可名叅軍也豈必
副淨爲之哉按美叅軍者漢和帝免館陶
令石耽罪每譙樂令衣白夾衫命優伶戲
美辱之終年乃放後爲叅軍戲所繇始矣

天籥

天籥星在斗牛間石氏星經云東壁之星
主文籍指此故漢稱秘書監爲東壁馬按

齋義不獨管齋又謂編竹習書世傳通占
大篆曆星經上下二卷不知何人所作載
天籥星在斗杓第二星西主關籥開閉明
吉暗凶菑及余考北宮七宿圖中無天籥
而天籥却在東宮七宿圖左箕宿之上斗
杓直指之凡八星其形如連環跳脫之狀
是矣星經欠核

五行先後

在天爲五緯在地爲五岳在人爲五行五行者一曰水二曰火三曰木四曰金五曰土水曰潤下火曰炎上木曰曲直金曰從革土爰稼穡此洪範所載先後如此雜書本文鑿鑿可據史記亦云水火木金土此五星者天之佐爲經緯見伏有時不知班固何緣有金木水火土之說載在白虎通後人因之遂不改矣

葉子戲

唐太宗問一行世數禪師製葉子格進之
葉子言二十世太子也後適符其識矣唐
朝葉子戲疑昉於此歟同昌公主一日大
會韋氏族於廣化里韋氏諸家好爲葉子
戲夜則公主以紅琉瓏盤盛夜光珠令僧
那抹立堂中而光明如晝焉其後南唐李
后主妃周氏編金葉子格即此戲也按葉

子戲自唐咸通以來天下尚之即今之扯
紙牌亦謂之鬪葉子近又有馬釣之名則
以四人爲之者唐格已不可考今自錢索
兩門而外皆水滸傳中人故余嘗呼戲者
曰宋江班或云是厭勝之術恐梁山泊三
之世以何凡士人讌會閨房雜聚與夫歌
爲厭勝耶臺舞榭之間酒壇博館之下盛行葉子舉
樽藉象戲之樂無以加於此矣然三門皆

以萬爲尊以九爲右惟錢門自空而九其
首選次選二色加以朱采者豈古六赤編
金之遺意乎奈何諸學士紛紛聚訟咸定
錄以葉子爲誤骰子選歸田錄以爲姓葉
彌子青房千里以葉子爲升官圖李易安
以長行葉子爲世無傳者揚用脩則引李
洞集中李郎中夢六赤因打葉子之事謂
今此戲不傳而胡无瑞矯楊氏之說直以

葉子爲今之投子或如酒牌至云葉子采
選之戲今絕不可考豈用脩元瑞諸君子
並未入少年場耶聯章累牘證辨不休夢
中說夢何殊蕉鹿

唐詩言海澄冥游見一外補頭在驢上訂茶錢令即此戲也

平易

平易之易即君子居易之易從去聲舊矣
後漢杜篤論都賦序或棄去阻阨務處平
易叶作入聲用然則二義固可通耶

郝皇后

按釋典有懺法本齊文惠太子薨陵文宣
王子良蕭氏譔淨住子輯成二卷未及
流通至大梁天監中命高僧刪蕪撮要采
摭妙語改集十卷題曰慈悲道場俗稱樂
皇懺懺當時郝氏方淪蟒類已承懺法獲
援超昇其事鑿鑿有據而兩京記所載則
謂郝皇后性妒忌武帝初立未及冊命因

忿怒忽投殿庭井中衆趨井抹之盾也化
爲毒龍矣烟焰衝天人莫敢近帝悲歎久
之因用爲龍天王便於井上立祠此說不
知何出豈承變麟之言而影響之耶楊夔
止妒論亦云梁武帝郗后性妒或云倉庚
爲膳療忌遂令膳之妒果減半然則郗后
之妒信有之矣及考梁書列傳郗氏諱微
善隸書讀史傳女工之事無不閑習齊建

武中高祖爲雍州刺史先之鎮後乃迎后
至州未幾殂於襄陽官舍時年三十二高
祖踐祚追崇爲皇后有司議謚吏部尚書
兼右僕射臣沈約謹按謚法忠和純備曰
德貴而好禮曰德宜崇曰德皇后觀此則
如忌之說又若所無史臣雖揚善隱惡亦
不宜有此溢美之謚也

匏瓜

匏瓜星名屬北宮七宿下與敗瓜離珠相連故曰敗瓜珠上匏瓜生即匏瓜無匹是也按天文集要記則稱庖瓜星爲天雞旗園然西宮七宿中別有天園星主果實旗畜儲矣而荊州占則云匏瓜一名天雞在河鼓東匏瓜明則歲大熟也故曰匏瓜無匹牽牛獨處其猶南箕不可簸揚北斗不可挹漿之意乎

解衣并糧

昔戎夷違齊如魯天大寒而後及門與弟子宿於郭門外寒愈甚謂弟子曰子與我衣我活我與子衣子活我國士也爲天下惜子不肖人也不足愛弟子曰不肖人惡能與國士并衣哉戎歎曰不濟夫解衣與弟子半夜而死羊角哀左伯桃二人爲友而賢似請道途共遇風雨糧不俱存角哀

乃并糧與伯桃得濟角襄入空樹中餓死
此二事並出春秋戰國之間而羊左之名
甚著戎夷無聞僅見於呂氏春秋亦絕相
類矣

太息

齊宣王太息動於顏色湣王亦慨焉太息
並見呂氏春秋至賈誼書可爲長太息者
六而史家僅載其三宋蘇長公作太息一

篇使秦少章藏於家三年然後出之矣論
定也余嘗疑太當爲大是浩歎之義後人
魚豕其字耳偶讀素問靈樞黃帝曰人之
大息者何氣使然歧伯曰憂思則心系急
心系急則氣道約約則不利故大息以伸
出之然則太息之當爲大息亡疑矣今考
有善太息病疑又按宋書領軍王玄謨舊
是大息之訛也部曲猶有三千人廢帝頗疑之撤配監者

玄謨大息深怨斯亦可証

金屈戌

屈戌亦名屈郛余曾見古金屈戌長可尺
餘廣象楣棱小殺鏤獸形若饕餮狀絕細
巧啣雙環意即古之金鋪耶梁簡文詩纖
成屏風金屈戌李商隱詩鎖香金屈戌杜
牧勤政樓詩惟有紫苔偏稱意年年因雨
上金鋪一物而異名至屈郛之稱則自李

賀詩中見耳西漢書元壽元年孝元殿門
銅龜蛇鋪首鳴鋪首即金鋪也及讀宋人
小說謂般輪見水中螽引閉其戶終不可
開遂象之立於門戶今門上排立而突起
者般輪所飾之螽也據漢書則鋪首作龜
蛇之形似不專於螽矣

灑灑

灑水落地聲灑水小聲灑灑見考工記而

宋玉高唐賦中巨石溺溺之灑灑兮李善
註曰溺溺沒也灑灑石在水中出沒之貌
乃唐人仲子陵五色琴絃賦遂訛爲泉魚
灑灑以躍鱗泉魚二字出吳志有本若言
灑灑是魚直作濡沫之類解矣然頭責子
羽已誤灑灑爲漁父事何忤後代相承也

六朝文法

疑耀舉劉越石贈盧諶詩宣尼悲獲麟西

特泣孔丘以爲文法不通不知錯綜其辭
政是六朝人妙處遐哉邈乎上哉夏乎皇
哉唐哉唐哉皇哉臣哉隣哉隣哉臣哉云
誰之思西方美人彼美人兮西方之人兮
左提右挈互舉兼稱何爲不可

草木

唐李周翰註文選典引混解草昧二字爲
草創冥昧青殊未暢夷考群書草木二字

各有義焉草木之初生曰甲旣秀曰英草
曰榮木曰莖草曰夭木曰喬草曰曹木曰
濯草曰薄木曰叢草曰搖木曰落草曰芳
木曰嘉草而不齊昧而不明曰草昧我輩
皆日用而不知矣

安定論史

班氏而下稱良史者其范曄之後漢陳壽
之三國乎即宋書出於約魏書成於收攷

以代降廉陞之勢使然其辭雅馴胡可盡
廢焉安定以爲亂人之史與小人之史是
必伸尼其人而後成春秋世無史學矣夫
劇秦美新至於今猶與封禪典引諸文並
垂不朽也豈可以其人而廢言哉又舉歐
陽之五代與延壽之南北並論則本之不
備而末焉是齊何啻千里不曰儼人于其
論耶

垂拱

垂拱尸居淵默之稱也而韓非子人主耳
服於玉堂之中人臣垂拱於金城之內則
謂君臣相與晏安非嘉語矣然初未嘗以
垂拱稱君也奈何後人誤解遂與端委同
我豈作者之心哉至唐明皇直以垂拱改
元爲號矣

東海于公

東海于公爲縣獄史郡決曹決獄平嘗抱
孝婦具獄哭於府上自謂治獄多陰德子
孫必有興者故欲高大門閭令容駟馬高
蓋車是于定國之父也近見後人文字直
指定國爲高門之于公以其亦嘗爲廷尉
民歌不冤故誤用之耳所宜考究

資斧

宋元嘉中有詔虐虜窮凶著于自昔未勞

資斧已伏天誅資斧出旅卦相傳爲道里之費疑其義取於師行糧從非漫然也

桑穀兩見于殷庭

殷太戊時有桑穀生於庭昏而生比日而拱高宗者武丁也先王道缺刑法違犯桑穀俱生乎朝七日而大拱考之太戊武丁不過再易世耳而桑穀兩生厥後獨晉愍懷時桑兩生於宮乃呂覽直以桑穀共生

爲成湯故事抑何舛甚將微謬悠其辭歟

王良

天官書曰天駟旁一星王良聖良策馬車
騎滿野星經則載王良五星在奎北河車
爲御馬官漢中四星天駟旁一星名王良
其說與史符節矣則何以復載造父五星
在傳舍南主御女官見則馬貴又有策一
星在王良前爲天子僕策御馬非因天官

書而附離其說者耶緯籍之不足馮徃徃
如此

古人墓文字簡

牧野

竹書紀年作坻野

有比干墓前有石銘題隸

云商大夫比干之墓所記惟此漢高祖素
父各爲立碑延陵季子十字碑在鎮江人
謂孔子書文曰嗚呼有吳延陵君子之墓
按古法帖上止云嗚呼有吳君弟共字而

已若延陵之墓四字疑是後人妄增除之
字外三字是漢人古篆不與前六字合東
都殖業坊十字街有王戎墓隋代釀家窰
其傍作窖得銘曰晉司徒尚書令安豐侯
王君銘漢西都時南宮寢殿內有醇儒
史威長葬銘銘曰明明哲士知存知亡崇
隴原豐非寧非康不封不樹作乘靈光厥
銘何依王史威長杜子夏葬長安北四里

臨終作文曰魏郡杜鄴立志忠款太馬未
陳奄先草露骨肉歸於后土竟氣無所不
之何必故丘然後即化封於長安北郭此
焉寔息及死命刊石埋於墓側東漢趙嘉
即趙歧與兄子書大丈夫遁無箕山之操
仕無伊呂之勳天不我與復何言哉可立
一圓石于吾墓門側刻之曰漢有逸民姓
趙名嘉有志無時命也奈何吳郡陸續豫

知亡日乃爲辭曰有漢志士吳郡陸績幼
敦詩書長玩禮易受命南征遭疾過庀遭
命不幸於戲悲隔唐傳奕武德中爲太史
令一病不問醫自誌曰傳奕青山白雲人
也以醉死古人墓文之簡只十餘字何嘗
不傳今人則聯篇累牘不訣地下則訣地
上耳買菜求益嚴光所以深歎歎按洛陽
伽藍記載後魏隱士趙逸答好事者語云

生時中庸之人耳及其死也碑文墓誌莫
不窮天地之德生民之能事爲君基堯舜
連衡爲臣與伊呂等跡牧民之官浮廟慕
其清塵執法之吏埋輪謝其鯁直所謂生
爲盜跖死爲夷齊妄言傷正華詞損實當
時作文之士慙逸此言據此則南北朝時
已然不獨唐人諛墓而已蔡中郎云平生
作碑文惟郭有道一篇無媿則西京時已

有此風耶余嘗見元人趙承旨孟頫集中
所載其自譔父母及祖父母墓誌僅敘生
卒爵里而已並不書事至於尚書故實所
載東晉謝太傅碑但樹貞珉初無文字蓋
重難制述之意此等識見高出千古

字義

凡字其類在左其義在右兄弟之子皆曰
姪从女至聲近者皆去女書人釋名中音

質作𡗗字解同志爲友从二又相交友也
近日皆加一點是友字矣友走犬貌遂使
椒蘭下同盧鵲按六書故云友蒲撥切犬
走足有所曳撥也詩云狼友其胡引而申
之越山川險阻爲友履友涉又爲友扈別
作𡗗記曰燭不見𡗗謂燭本也凡禮傍从
示周官地曰示亦作祗凡神示之屬皆从
示謂顯設昭示也說文天垂象見吉凶以

示人也初𠂔从衣初从衣从刀始裁之初
之義也近者廢示从衣名曰禮衣𠂔不知
何出而衣服之類𠂔多缺點與示字初無
分別又卩字在右讀邑在左讀阜古體郡
字多書𠂔凡都邑之名並如此書而御卿
節即却卯柳叩卸卸諸字並宜从口今一
概溷書毫釐不辨豈作者之意歟勇字从
角言角力也俗作勇者非而角象形與刀

魚相似又有音錄者角里先生誰謂雀無
用之角是也俗語有一撇兩點之分其實
字形無二近說詩者蓋訛其音不析其義
矣須臾之須从彡今悉从水不知湏字音
媚蓋水名宋人劉湏溪是也臾字从申从
乙俗作臾者非凡楊字从木惟揚州揚子
雲二字从手古作𢇛今稱𢇛歷中外讀作
入聲者誤又博字協字旁宜从十疋字相

居切在上平六魚中近日凡書匹偶馬匹
皆書疋字斯豈配儷之義哉日月象形江
河諧聲止戈爲武挽弓爲引人負戈爲戍
戍含一爲戍矢貫弓爲弔人執圭爲佳大
羊曰美不从火點水成氷不从二氷音凝
李陽氷
鬲字非門畫字非画回字从口峰字从丰
降字从斗溥字从甫豈而山側緣彖从互
王字中畫近上綱衣無裏曰禪功效之効

非文修爲之修非月安寧之寧从心于寧
之寧从丁務面从刀嫠婦从女象乳曰乳
禁止曰毋素餐饗殮毫釐宜辨菅蒯管仲
織悉宜分出內之內非人根蒂之蒂非帝
車軌之軌不丸長幼之幼是力看字以手
遮口之象集字鳥聚于木之理如斯之類
牛汗難窮並宜研求無使千里李涪常曰
此而不悟曷曰文人近督學使者校士江

南齊書卷多不稱意嘗謂士子字學不明何以通於文義有少年生理旣荒謬復以鄉黨之鄉誤作卿字大怒深加黜責嘻疇謂稅可無游哉

瓜祭上環

雖蔬食菜羹瓜祭必齋如也禮云瓜祭上環斯可證矣蓋古人凡食必祭物之先故蔬菜瓜三者物雖微而食之羹之祭之不

唐荊川集卷二
敢不致其追敬之禮仲尼所以必齋如也
先儒訓詁改爪爲必於義未通亦豈聖人
之肯歟

焚蘇

采薪曰焚采草曰蘇莊子蘇者取而爨之
故鮑明遠寄妹太雷書云焚蘇一歎舟子
載泣蓋指焚蘇爲採焚者若史記焚蘇從
爨周子仲黨焚蘇不爨清談而已又直指

爲菊藁之屬矣古人互舉兼稱往往如此

紅靺鞨

近見註本草者云山海經所稱采石即寶石也碧者唐人謂之瑟瑟紅者宋人謂之靺鞨今通呼爲寶石以鑲首飾器物按西陽雜俎代宗即位日慶雲見黃氣抱日楚州獻定國寶一十二初楚州有尼真如忽有人接去天上天帝言下方有災令此寶

鎮之其數十。第七曰紅韎鞮大如巨栗。又李景亮傳唐人李章武悅其逆旅妻。婦與之私通。後李再過而婦已死。悵然求。寤其夜婦果至。交合歡好如初。臨別解贈以紅玉一枚。云是西王母所遺。韎鞮寶翡翠人間物也。囑章武珍重。據此則韎鞮之稱名匪自宋矣。今之鑲首飾器物者皆下品寶石。恐不足當瑟瑟韎鞮嘉名。

搏頰

淮南子曰黃帝作竈死爲竈神夫黃帝仙
矣不爲神乃爲竈乎鄭玄以竈神爲祝融
之神亦非也積古相傳蘇伯吉利是生祝
融逮妻搏頰死託于竈故戴氏禮云竈者
老婦之祭其說可証然則竈神是祝融之
妻搏頰亡疑邃古時已有之矣夫吹律聽
聲以別其姓雖是聖人妙用而天子因生

以錫之至周始大備焉在祝融時安得便有姓名字之謂而酉陽雜俎五經異義諸書漫稱竈神姓張名禪字子郭一名隗音利姓蘇夫人姓王又竈神之名曰壤子紛紛傳說豈非僞而託者歟一竈神也而姓名不倫又有眷屬邪說附會可資笑談祝融一本作祝庸今人直以祝融爲老婦抑又訛之訛矣

沈郎腰

梁沈約久處端揆有志台司而帝終不用
乃求外出又不許約與徐勉素善遂以書
陳情于勉欲求歸秩故云百日數旬革帶
常應移孔以手握臂率計月小半分以此
推算豈能久支後人便稱沈郎腰矣法喜
志乃云一時以風流見稱而肌體清癯時
語沈郎腰瘦似未核之梁書耳

蘭燕

少時有前輩閱初唐人王子安七夕賦讀
至引驚蟬于寶瑟宿蘭燕于瑤筐謂蘭燕
對不過驚蟬當是闌珊之闌後人誤刻葉
頭耳坐客擊節稱善余從席隅輒進一語
古者不嘗以七月爲蘭秋乎然則七夕之
燕獨不可稱蘭耶若改蘭爲闌殊無意味
王君彩筆當不其然一時座客復爲改容

史文矛盾

北隋史高頻傳載陳平晉王欲納陳主寵姬張麗華頻曰武王滅殷戮妲己今平陳國不宜取麗華乃命斬之王甚不悅乃南陳史中張貴妃傳復云隋軍剋臺城貴妃與後妃俱入井隋軍出之晉王廣命斬之于青溪中一事而兩見出于一人何其前後不倫矛盾若此甚也

趙飛燕別傳

說郭有趙飛燕別傳其文遠遜伶玄走瑞
以爲六朝人作竊謂不然即蘭湯灑灑曙
儀坐其中若三尺寒泉浸明玉一篇之中
獨此三語爲俊元瑞所極賞者稱其敘事
如畫出伶玄右不知此語蓋有所承按麗
情集載陳鴻秀才長恨歌傳云詔浴華池
清瀾三尺中洗明玉蓮開水上鸞舞鑑中

然則唐人已先述之矣比于玄傳廣體
發占燈燭七字適麗古健相去奚啻天淵
劉季

近見史詮一種乃新都某君子譔論馬遷
是漢代人不宜直呼高祖劉季殆不然史
記乃太史公譔著列代之史自三皇五帝
以訖于漢非漢史也安得不數稱劉季且
當其爲亭長時往賀呂公綰爲謁曰賀錢

萬實不持一錢蕭何曰劉季國多大言少
成事呂公亦遂呼季曰無如季相願季自
愛呂媼亦怒呂公曰何自妄許與劉季蓋
古人相與語多稱字漢惠諱盈字滿顏師
古注曰臣下以滿字代盈者則知帝諱盈
也他皆類此又高帝諱邦字季邦之字曰
國顏師古注曰邦之字曰國者臣下所避
以相代也然則名可諱字固可稱何害

戲瑕第三

醫錢希言譔

新野馬之駿拔

桃符

周人木德以桃爲更言氣相更也漢兼用
之遂立桃梗於門戶畫鬱臯葦茭其上應
劬風俗通曰梗者更也歲終更始受介社
也黃帝書稱上古之時兄弟二人曰荼與
鬱住度朔山上桃樹下簡百鬼或又云黃

帝治而象之則又非始於周而桃印桃弧
桃棖桃杖之製繇是紛紛起矣桃印本漢
制所以輔卯金至魏除之後世則用桃符
于門其猶行古之道與按荆楚歲時記正
月一日造桃板着戶謂之仙木注桃者五
行之精厭伏邪氣制百鬼也又曰帖畫雞
于戶上懸葦索插桃符其傷百鬼畏之括
地圖曰桃都山有大桃樹盤屈三千里上

有金雞日照則鳴下有二神一名鬱一名
壘并執葦索以伺不祥之鬼得則殺之三
說與應劭相符獨二神名稍異耳據此則
桃板桃符各有分別焉古之桃符必是書
成或用絹素象形而製如今午日造辟真
符之類既云插其傍必非木板而今世造
桃板着戶第可言桃板可稱仙木已耳以
爲桃符名雖韻而實則舛矣按朝野僉載

云唐明崇儼有術法文宗試之爲地窖遣
伎奏樂引儼至謂曰此地常聞管絃是何
祥也卿能止之乎儼曰諾遂書二桃符其
其上釘之其聲寂然信如斯言則桃符是
用筆書成以爲厭勝之術非板於門者也
揔把新桃換舊符乃宋人詩何足馮據然
今世不用桃木作板而以凡木塗之繪盤
桃花實於其上其善沿楚漢之遺意乎

張公喫酒李公醉

唐武后時有張公喫酒李公醉之謠張公
謂易之昌宗兄弟也李公謂中宗也此即
薛王沈醉壽王醒之意一日士人有犯夜
而非其罪者舉此爲辭官遂命賦其事士
人援筆立構數言主者笑而釋之此語流
傳至宋則宗門老宿無不拈出來作對荅
人底話頭味之却真有不可思議道理在

其時又有張公帽兒李公戴至今相傳又有張三有錢不會使李四會使却無錢之諺疑亦是此意耳後世行市語有張三李四皆非漫然無本魯酒薄邯鄲圍罪生車旣歸乙事機莫測曷足怪乎諸老先生乃謂皆是亂說然則聖人何以擇言於芻蕘

破瓜

碧玉破瓜時郎爲情顛倒芙蓉凌霜榮秋

容故尚好碧玉破瓜時郎爲情顛倒感郎
不差郎回身就郎抱此古碧玉歌宋汝南
王寵愛其妾碧玉而作是歌也窈窕上頭
歡那得及破瓜但看脫葉蓮何如芙蓉花
此古歡好曲也與子夜歡聞讀曲華山畿
諸歌同意正以破瓜喻女子破身古人託
物比興若芙蓉荳蔻之屬無之非是許氏
說文訓辨字爲瓜中實斯可以反其隅矣

宋楊文公誤解呂純陽功成當在破瓜年
謂俗以破瓜爲二八而凌氏核劄亦執是
說遂云破瓜即二八非女子破身也何不
於碧玉歌歡好曲二辭求其義乎洞賓談
閉房之術大畧謂仙家采藥須明鼎候不
失其候成功無難破瓜年者即仙經所云
海水潮生山頭月白之義其術要取二八
生門實非指破瓜爲二八也核劄又謂填

詞者云未破瓜剛二八爲悖語亦似未然
王實父北西廂香美娘分破了花木瓜深
得六朝樂府意豈亦悖耶金元人製曲自
是立言而不知者以爲填詞也

楊妃竊笛詩

楊妃以竊吹寧王紫玉笛忤旨放出後復
使高力士就召以歸故詩人張祐詩曰梨
花靜院無人見閒把寧王玉笛吹此載大

眞外傳有據而容齋續筆則云金輿達曉
無人見偷把邠王小管吹萬首唐人絕句
洪所緝而進呈者其所載張祐詩以邠王
小管爲題考之唐書寧王未嘗封于邠或
寄託之辭如王維賦餅師而題稱息夫人
之屬是耳不然何爲使李公戴弼公嘲耶
抑或以承寧嗣邠故遂舉竊笛事附會之
殆不可曉

按承寧是章懷太子孫邠王守禮子天寶初嗣封于寧哥也

客星

凌氏核劄稱客星有三一曰老子星二曰國皇星三曰溫星謂老子乃古之有壽德之人非李耳之老子也國皇乃國星不知爲何國人溫星性溫乃古之有操行者然則三星皆吉曜耶以余所考似未然客星者周伯老子王蓬絮國皇溫星凡五星皆客星也周伯大而色黃煌煌然見則其國

兵起若有喪天下飢衆庶流亡去其鄉老
子明大色白淳淳然所出之國爲飢爲凶
爲善爲惡爲喜爲怒出見則兵火起入
有憂王者以赦除咎則菑消王蓬絮狀如
粉絮拂拂然見則其國兵起若有喪白衣
之會其邦飢亡又曰王蓬絮星色青而熒
熒然所見之國風雨不如節雋旱物不生
五穀不成登蝗蟲多國皇星出而大其色

黃白望之有芒角見則兵起國多變若有
水飢人主惡之衆庶多疾溫星色白而大
狀如風動搖常出四隅出東南天下有兵
將軍出于野出東北當有千里暴兵出西
北亦如之出西南其國兵喪並起若有大
水人飢又曰溫星出東南爲大將軍服屈
不能發者出於東北暴骸三千里出西亦
然蓋此五星者行諸列舍十二國分野各

在其所臨之邦所守之宿以占吉凶又星
大事大星小事小星色黃得地色白有喪
色青有憂色黑有死色赤有兵各以五星
占之大都此五星皆雜妖所出形狀不同
爲殃則一其出不過一年若三年國必有
大菑京房臨刑謂人曰吾死之後客星當
入天井又華陽國志載蜀中傳相告曰井
中有人學士靳普言客星入東井益州之

分憂刺客入耳據此二說則望而知其非
瑞星明矣太公陰謀亦曰六庚爲白獸在
上爲客星在下爲害氣斯可証也初成少
年博洽或其家多異林別有所攷而爲是
說耳

夢中李白詩

黃庭堅太史在蜀時泊舟江上夜夢李白
謂云吾平生有蜀江竹枝詞三絕恐集中

傳寫失其真爲君誦之庭堅醒而記其語
一一著之于書即今相臺岳珂載入程史
自卷是矣其末章有北人墮淚南人笑青
壁無梯聞杜鵑二句厥後靖康之變詞人
賦感懷中即承其語用之南人墮淚北人
笑臣甫低頭拜杜鵑宋詩學古大都如此

神女賦

神女賦中王王二字互書蓋其夜王寢夢

與神女遇者王字乃玉字耳明日以白玉者以白王也王對應作玉對纔是不應王對曰之後又有一王曰也此說千古不刊余記得科斗時事嘗命書傭繕寫諸賦數卷自楚訖唐合爲一帙命其名曰列繡編是時業已如此政之後見李上饒家刻出賦苑板雖不佳却合余意不知何人所校據凌初成核劄云張伯起纂文選注時已

改定矣初成又謂宋人沈存中筆談先有此說余考筆談未之有也然核劄既已詳哉其辨之矣不知古玉字元無一點後隸書始加點以別帝王字耳玉字象形本從王省文徐氏所謂王中畫近上王三畫勻也李陽冰曰三畫正均如貫玉蓋字義如此今世傳璧字碧字與璠璣環瑗之屬諸王或在上下或在半邊亦初未嘗有點可

以反矣去古旣遠文字脫誤訛以傳訛往
往而是在有唐諸公含毫賦詩無不舍懷
王而歸美于楚襄何惟乎今之讀騷選者
耶想其時便已烏焉成馬矣第閱高唐神
女登徒子好色三賦莫不以楚襄爲首一
則曰楚襄王與宋玉游于雲夢之臺一則
曰楚襄王與宋玉游於雲夢之浦使玉賦
高唐之事一則曰大夫登徒子侍於楚襄

王而短宋玉又玉所賦高唐末有風起雨
止千里而逝蓋發蒙自會注云言如風雨
之疾王至廟如發其蒙自時與神會也臨
下遂結以九竅通鬱精神察滯延年益壽
千萬歲注又云言今與神會九竅通暢精
神得以自察故延年益壽耳然則夢與巫
山神女遇者直謂楚襄王事可也縱令相
受其名政亦何害存中辨證實未及此

四皓

四皓者皆河內軹人也或在汲一曰東園公二曰角里先生三曰綺里季四曰夏黃公皆修道潔已非義不動秦始皇時見秦政虐乃退入藍田山而作歌據皇甫謚高士傳所載如此而陳留志則曰韋康字宣明襄邑人也常居園中故世謂之園公與河內軹人角里先生綺里季夏黃公爲友

皆修道潔已非義不踐富秦不慕離人而
洛山隱居自娛此說與高士傳相合然而
獨載園公姓名字里亦不稱東園公也余
又嘗見一書載四皓姓字極詳別當再考
秦會稽刻石

余往年在山陰道上行而未及登秦望山
一觀李斯石刻深以爲恨越州人傳言秦
望山頂僅有李斯沒字碑特一頑石耳然

則李斯所書秦會稽刻石頌始皇功德凡
二百八十有八字皆全文無脫落公稱篆
字畫與嶧山碑絕類者即古刻湮滅唐碑
宜在今當置之何地耶齊竟陵王千良對
曰登秦望山主簿范雲以山上有始皇石
刻人多不識乃夜取史記讀之明日登山
雲讀如流子良大悅以爲上賓即此碑耳
自蕭齊至今閱千有餘年理難斷然始故

虞瑀 卷三
向曾見士大夫家有屏風樹本疑是唐帖
非本來面目矣

瓜當

蒂瓜當也老子深根固蒂之蒂謂此而
韓非子根者書之所謂柢也柢也者木之
所以建生也深其根固其柢長生久視之
道也則直言木根耳或云華葉之根曰蒂
木之根曰柢通作氏蓋二字稍有分別

牽牛織女

長恨傳載唐玄宗天寶十年侍輦避暑驪
山宮秋七月牽牛織女相見之夕秦人風
俗夜張錦繡陳飲食樹花燔香于庭號爲
乞巧宮掖間尤尚之時夜始半侍衛於
翠西廂楊妃獨侍上上憑肩而立因仰天
感牛女事密相誓心願世世爲夫婦言畢
各嗚咽桂苑叢談載唐肅宗時鄭侃之女

年十六名采娘七夕夜陳香筵祈于織女
是夕夢雲輿雨蓋蔽空駐車命采娘曰吾
織女也祈何福曰願丐巧耳乃遺一金鍼
長寸餘綴于紙上置褰帶中令三日勿語
汝當竒巧據此則世傳牽牛織女七月七
日相見之說果非誣邪至道書謂牽牛娶
織女負天帝備禮錢二萬久而不還被驅
在營室東方朔內傳則載太白星竊織女

侍兒梁玉清逃衛城小仙洞四十六日不出天帝怒命五岳搜捕太白歸位玉清譴于北斗下常春有子名子休配與河伯驤乘行雨此二說雖出荒唐而存之載藉可資盟囑矣後又閱一小說稱士人蕭昉夢入蕊珠殿與一女成婚乃舊曾見諸葛氏也交拜成禮旁有仙女梁玉清唱云華陽玉女聖世才郎若然則梁玉清之名天上

信有之乎夫織女且被驅矣侍兒謫春豈
應復住藥珠殿上耶宋廢帝嘗令楊玉太
伺織女渡河曰見當報我不見將殺汝此
事尤足解頤按爾雅云河鼓謂之牽牛書
歌云東飛伯勞西飛燕黃姑織女時相見
爲吳音訛而然耳今吾鄉婁昆之間有黃
姑織女渡是也余閱天文井宮七宿圖併
按其歌云牛上直建三河鼓鼓上三星彌

織女左旗右旗各九星河鼓兩畔左邊明
輦道漸臺在何許欲得見時近織女蓋織
女之下有漸臺輦道左旗右旗四星分隕
其下纔是河鼓則荊州呼牽牛爲河鼓之
說不爲無據矣而星經却載織女三星牽
牛六星而外別有河鼓三星在牽牛北主
軍鼓蓋天子三將軍也是指女牛之牛爲
牽牛豈其然乎按圖則河鼓之下又有天

杼一星天杼之下乃是牛宿與女宿尚隔
羅堰一星耳豈可據以爲牽牛也又考諸
緯書云牽牛神名畧一名天關織女神名
收陰牽牛星主關梁織女星主瓜果絲帛
收藏珍寶其說甚多後人乃稱牽牛爲天
孫呼織女爲北斗佳人

青島

青島故事甚多其見於山海經者有九一

曰三危之山三青鳥居之

主為西王母取食者別自栖息

于此

一曰龜山南有三青鳥

為西王母取食

一曰

女祭女戚在奇肱一臂之北居兩水間青

鳥所集一曰王母之山有沃之國是謂沃

之野有三青鳥一名大翊一名少翊

音黎

名青鳥

皆西王母所使

一曰玄丹之山爰有青鳥

一曰附禺之山爰有青鳥一曰平丘在三

桑東爰有遺玉青鳥一曰中容之國東北

海外有三青鳥一曰互人之國有青鳥身黃赤足六首名曰觸鳥音觸其見于竹書紀年者則曰十七年穆王西征昆侖丘見西王母其年西王母來朝賓于昭宮沈約附注云王西征于青鳥所解三危山其見于王褒雲陽記者則云鈎弋夫人從至甘泉而卒尸香聞十餘里葵雲陽武帝思之起通靈臺于甘泉宮有一青鳥集臺上往來

至宣帝時乃一至其見於葛洪神仙傳者
東陵聖母從獄窗中飛去衆望見之轉高
入雲中留所着屨一緗在窗下自此升天
遠近立廟祠之民所奉事禱祈立效常有
一青鳥在祭所人有失物者乞問所在青
鳥即集盜物人之房上其見于十二真君
傳者吳猛有道術忽一日狂風暴起猛乃
書符擲于屋上有一青鳥啣符而去須臾

風定人或問之答曰南湖有遭此風者其中二道人呼天求拯故以此拯焉後人訪尋果如所述其見于墉城集仙錄者緱仙姑入道居衡山年八十餘容色甚少於魏夫人仙壇精修香火數年後有一青鳥形如鳩鵲紅頂長尾飛來所居自語云我南嶽夫人使也以姑修道精苦獨栖窮林命我爲伴每有人游山必青鳥先言其姓字

又一日青鳥飛來曰今夕有暴客無害勿
以爲怖也其夕果有十餘僧來毀魏夫人
仙壇歲餘青鳥語姑遷居日所因徙居潮
南島亦隨之而往其見于博異志者唐貞
元中秀才白幽求從新羅王子過海於太
湖公島夜遭風飄至一處山高萬仞兩山
半腹有城壁臺閣門宇甚壯麗維舟而昇
到城一二里皆龍虎列坐于道兩邊諸龍

虎時時目幽求盤旋次門中數十人出龍
虎奔走人皆乘之下山幽求亦隨之維舟
處諸騎龍虎人皆履海面而行須臾沒
遠碧中忽見從西旗節隊伍近千人鸞雀
青鳥飛引于路有乘朱鬣馬人衣紫雲
月衣上張翠蓋如風而至夫此一青鳥也
而注記之雜然不同若此後人遂訛漢宮
七夕事爲青鳥傳書夷考群籍所載青鳥

凡十有五初未嘗言傳書也漢宮傳王母
使命者乃墉城玉女姓王名季登是西王
母紫蘭宮使者着青衣美麗非常實一女
子耳安得謂之鳥哉按少昊摯以鳥組官
故青鳥氏司啟然則邃古時已有此鳥非
出不經而唐人本王母駕玄鸞之說因賦
青鸞飛出建章宮填詞家遂以青鸞對黃
犬從此河漢無極矣又杜甫玄都觀壇歌

唐
云子規夜啼山竹裂王母晝下雲旗翻王
母即漢宮所降西王母也乃宋人張邦基
著墨莊漫錄直以王母爲鳥名作子規對
解老生不窮義理惟事穿鑿千載而下使
人掩口胡盧世傳鵲爲青鳥以立春日
始鳴故少昊以之司啟也

遺忘二事相類

唐三原縣令閻玄一爲人多忘曾有人傳
其兄書者止于階下俄而里胥白錄人到

一索杖遂鞭送書人數下其人不知所以
訊之一曰吾大錯顧直典向宅取棣酒懷
滄良久典持酒至一既忘其取酒復忘其
被杖者因賜直典飲出朝野僉載唐青州臨朐
丞張藏用嘗召一木匠十召不至藏用大
怒使擒之匠既到適會鄰縣令使人送書
遺藏用用方怒解木匠又走讀書畢便令
剝送書者答之至十送書人謝杖請曰某

爲明府送書縱書人之意惟明府使者備
罪藏用乃知其誤謝曰適怒匠人不意誤
答君耳命里正取酒一器以飲遂書人爾
別更視事忽見里正指酒問曰此中何物
里正曰酒藏用曰何妨飲之里正拜而飲
之藏用遂入戶送書者竟不得酒扶杖而
歸山紀右此二事見于二書一時相類豈
其偶合若此非傳聞之誤必衆空之說矣

唐人小說往往而然無足怪者

凡鳥

禽經云羽蟲三百六十鳳爲之長故从鳥
从凡凡摠也魏人題門義蓋出此然古作
朋字即翮字象形耳以鳳能鳩類飛則群
鳥相隨萬數故曰朋黨又古以風字當鳳
字亦當鵬字而淮南子九嬰大風楊用修
鈎玄云大風即大鵬也據錢功父云前科

禮闈中程策內有兩月爲朋之語館中諸公所撰余實未之見云

舫

兩舟相竝曰舫故其字从方舟今官舟頭相竝而行者而西湖游船一載優伶簫鼓一載酒筵真可稱畫舫矣唐人陶峴彭澤之後日製三舟一自乘一載客一載酒饌又幽冥錄載京口徐郎常于江邊拾流柴

忽見江中連船盖川而來逕迴入浦對徐
而泊遣使往云天女合當爲徐郎妻徐隱
藏屋角母兄妹勸勵強出未至舫先令于
別室爲徐郎浴水芬香非世常有贈以纈
絳之衣又異苑載劉穆之嘗渡揚子江宿
夢合兩船爲舫上施華盖儀飾甚盛以升
天後官至僕射丹陽尹又南北史中稱舫
甚繁陳朝度支尚書孫瑒出鎮郢州乃舍

十餘船爲大舫於中立亭池植荷菱每歲
辰美景賓僚並集泛長江而置酒亦一時
之勝賞焉據此則連船之爲舫歷歷可
今人一概溷殺凡船皆稱舫豈析製字之
初義哉

拱揖有辨

今人以拱爲揖首與掌皆在地殊不知所辨
世廟中有御史陳君名九德按江南見將

官下階俯身作拱若膝行而退狀歎曰禮
貴適中是揖也非拱也無乃太過乎於是
下令千鈐下拱與揖當有辨據此則縣文
苛節自昔已然今特未之有改耳

甬路

疑耀以輦路爲閣道是矣而指甬路爲飛
閣之複道似非按今之甬路疑卽古之馳
道也官署墀中亦云然者謂其甃形隱起

象涌出之義耳漢書應劭注曰馳道若今
之中道賈山曰秦爲馳道東窮燕齊南極
吳楚道廣五十步三丈而樹厚築其外隱
以金椎

杜陽學拾遺

唐人武功蘇鄂所著杜陽雜記卷一裴麗司喜
全學王子年拾遺可謂衣冠卷二孟而卷三定
九流緒論中博物杜陽之祖也似失鑒裁

尚左右

右貴左賤法地道也故右司馬丞相尊於左先軫曰軍事勝爲右藺相如位廉頗右至近代無不尚左矣或謂尚左之說因循至我朝始定余嘗讀白氏長慶集云魏晉以還右卑于左即此可証尊左卑右之禮豈自明始哉今獨文字稱謂之間猶以陞擢爲右轉降謫爲左遷而主人肅客從

西階而上北人揖客于右謂之北禮如此之類尚不失先民遺意乎

不律

楚謂之聿吳謂之不律燕謂之拂秦謂之筆相沿久矣唐人又稱銀不律本此今垂子科浙江鄉書序中有提不聿入貢士籍之語余訊之左丞豈筆誤耶左丞曰原本如是不可改也中間至以理學爲宋諱而

稱宋尚佛本朝尚紫陽宋何嘗尚佛即我
朝之尚紫陽不過沿宋氏之末流耳今之
大夫褒衣緩帶禹步堯趨斯其人竝操戈
考亭之門者夫安得謂之尚乎錄序不知
何物老生捉刀乃木天貴人曾不加點檢
依樣圖之邢子才云誤書思之亦是一適
信名言哉

綠腰舞

綠腰唐曲名盧金蘭善爲綠腰玉樹之舞
建中中康崑崙琵琶稱第一手登樓彈一
曲新翻羽調錄要即綠腰是也白樂天楊
柳枝詞則曰六么後王建宮詞亦因其聲
按宋人青箱雜記載曲有錄要者錄霓裳
羽衣之要也其拍即唐書吐蕃傳所謂涼
州胡中謂錄要雜曲而今世語訛之爲綠
腰耳

君公

君者諸侯之稱公者大夫之稱漢以前君尊于公故孟嘗稱父爲君秦漢之間封號皆稱君凡漢碑所載亦皆稱君而不稱公大君者尊異之辭歟漢王罵項羽爲公顏師古注云輕賤之也可証至漢末蔡邕撰楊太尉碑銘桓麟撰劉太尉碑銘始稱公焉孔融深敬鄭玄告高密縣曰鄭君好學

實懷明德昔太史公廷尉吳公謁者僕射
鄧公皆漢之名臣又南山四皓有東園公
夏黃公潛光隱耀世嘉其高皆悉稱公然
則公者仁德之正號不必三事大夫也今
鄭君鄉宜曰鄭公鄉據此則稱公昉自漢
末無疑繇此公尊于君三國六朝三唐以
後無不稱公至南史臣下皆呼帝爲公矣
獨唐顏真卿撰其父廟碑稱唐故通議大

夫行薛王友柱國贈秘書少監國子祭酒
太子少保顏君廟碑銘而中間有君之曾
祖君之祖君之父紛綸盛美舉集于君諸
語差不失古稱先君之遺意乎今人助以
君稱加于同類公稱加于下僚殊亡差等

五大夫松

五大夫秦官名第九爵也漢書郊祀亦云
爵九級爲五大夫顏師古注曰大夫之尊

也秦始皇登泰山遇風雨避于松下遂封
爲五大夫今秦松在黃現嶺者雖非秦時
故物然即所謂封五大夫者矣按史記但
云封其樹爲五大夫應劭漢官儀亦第稱
仰視岩石松樹鬱鬱蒼蒼若在雲中而已
未聞有五株之說今之訛爲五株其說皆
起于唐此理之不敢強解者陸贄作禁中
卷松詩云不羨五株封李白送人游桃源

詩敘云登封太山五松受職李商隱五松
驛詩云獨下長亭念過秦五松不見見輿
薪而獨異志則稱泰山有五松樹蔭翳數
畝乃封爲五大夫又聞松上作人言左右
者雖其說不知何據然初學記出集賢院
學士徐堅等所撰而禮部封禪第八敘事
中載始皇上泰山中坂遇風雨休於樹下
因封其樹爲五大夫注云五松樹據此諸

說則傳訛非始于今日明矣又按秦松考
云五松只存其一亦後人續植者老榦拳
曲擁腫宛若蒼龍勢欲飛騰及閱王弼州
游太山記則云黃現有松五即所謂五大
夫以厄于石不能茂而稍具虬虺狀當是
二三百餘年物其說與秦松考截然不同
制草用琵琶記

范叅議允臨言 世廟時某老先生代草

某官妻孺人綸誥直用蔡中郎琵琶記語
儀容俊雅德性幽閒八字舉朝無不掩口
笑之據云徐宗伯識餘錄中已載其事矣

蘇意

華亭宋孝廉懋澄言其同鄉許公樂善先
年爲西臺御史時方掌河南印有新選駙
馬請臺考論一篇此命題於外隔三日送
進蓋國家虛設故事也許遂于其論義

後批大有蘇意四字蓋稱其文氣得三蘇
意味耳此批亦元無緊要不虞一時爲長
班傳出傳者聽者竝誤作蘇州之蘇解至
是臺省卿寺及館中諸公無不交口稱蘇
意沿爲常談後至聞于禁掖至尊亦言
蘇意六宮之中無不蘇意矣蘇意者言吳
俗脫略不拘也今賓主分席西坐又謂之
蘇坐遠近傳訛悉備于此伏獵弄麀何代

無之可供團扇掩口

同功縣

古樂府有絲用同功縣今吳興養蠶家以
兩蠶共作繭者謂之同功縣價倍于常其
絲以三繭抽者爲合羅絲歲以充造御
服山龍華蟲粉米藻火竝出于此士庶家
不得濫而用也閩人謝肇淛著西吳枝乘
載及之據此則鄉貢八蠶之繭當時定以

八蠶共作一繭後世所無而解者誤爲一
歲之中蠶得八收豈同功之義哉

纓珞

人馬之頸飾竝曰纓絡而唐玄宗合宮妓
佩七寶纓珞舞霓裳羽衣曲釋典亦多稱
此二字則西域志中所謂落以隋珠和璧
者歟此落字又與莊子落馬首之落義同
矣然有樹名纓絡者形體皆檜其條弱倒

垂如盤纓隨風旖旎俗呼曰纓絡柏然是
恐非

善財叅觀音

補陀落伽山一名梅岑云即梅子真煉藥
處佛經言東大洋海西紫竹林相傳謂善
財第二十八叅觀自在菩薩圍繞說法蓋
此地也華言小白華山以故祝釐士女航
海而來者肩駢趾錯歲不絕云考之華嚴

本經善財所接大善知識凡五十三頁補陀觀世音特其一叅耳後人以五十三叅俱附會入觀世音案中不知何說而案龍眠有畫善財童子叅觀世音大士三十二變石人作六七歲小兒狀幀各綴偈流傳

貴籍

昔人著塵集在會古人之名然其名

雖假託乎其書不得謂之僞也今人則襲其所著之書爲射利計而所假託者不過取悅里耳足矣夫廣至今人而淺陋則已極也琅環記傳是余邑桑民惲悅所藏視希哲允明竊之第無核據攷之二公集中初未嘗用琅環語後此而作者有緝柳編女紅餘志諸書五六種並是贗籍不知何人締構顧多俊事致談書類勝國要或近

時好事者爲之耳比來盛行溫陵李贄書則有梁溪人葉陽開名書者刻畫摹倣次第勒成託于溫陵之名以行往來小選郎嘗爲余稱李氏藏書焚書初潭溪此書非西廂四部郎中郎所見者亦止此而過數年前溫陵事敗當路命毀其籍吳中鉞藏書板竝廢近年始復大行於是有李宏父批點水滸傳三國志西游記紅拂明珠

王合數種傳奇及皇明英烈傳並出葉筆
何關於李頃又有贗表中郎書以趨時好
如狂言杭人金生誤而一時貴耳賤目之
徒無復辨其是非相率傾重貲以購秘諸
帳中等爲楚辭良可嗤哉晝落魄不歸人
也家故貧素嗜酒時從人貸飲醒即著書
輒爲人持金鬻去不責其值即所著舊齋
漫錄者也近又輯黑旋風集行于世以譏

刺進賢斯真滑稽之雄已昔嘗于太原齋
頭見雲間刻顧氏詩史閱之乃中翰正誼
名也余與王先生相顧驚歎王先生曰盍
嘗君能得士此豈虎頭公所能辦哉後余
過雲間乃知華亭有詞人唐汝詢仲言者
目雙瞽著成是書顧氏以三十金詭得之
嗟乎唐生之文誠賤何至此甚也千古不
白之冤竢異世子雲者起故當有定論耳

管仙客嘗見唐人譔春秋調人一書蓋調
和膏肓廢疾墨守三家而成文者其書雖
亡豈遂無其目耶戰國策十卷約從五之
連衡五之鮑彪舊注劉向定本然非龍閣
所采書也蓋必有古本是何從見哉坊刻
大唐西域記後乃雜三王太監下西洋事
令玄奘絕倒地下矣近吳中官刻幾汗牛
爛用貴人千金以馮觀察諸公言之並是

僞託者余欲起而糾繆聞者不腊其舌乎
隨清娛墓碑可疑

清娛姓隨氏平原人漢太史令司馬遷侍
姬也年十七歸遷遷凡游名山必以清娛
自隨後隨至華陰之同州而遷召入京師
留清娛于同已而遷陷極刑發憤著書未
幾病卒于京清娛聞之遂悲憤而死州人
葬之于其亭子下忘其名厥後唐褚遂良

刺同州清娛乃感夢于遂良具言始卒云
上帝憫其年壽未盡以死因命爲此州之
神廟食一方然圖籍未載世人莫有知者
以公爲一代文人求志其墓光揚幽懿遂
良欣然命筆其銘皆四字不過數句而已
按碑文如此近新安下雲鵬得此碑乞范
參議允臨譔跋參議出以示余歎見所未
見也第余竊有疑焉司馬子長二十而南

游江淮上會稽探禹穴窺九疑浮沅湘北
游汶泗講業齊魯之都後歸自東楚始入
仕爲郎中已又奉使西征巴蜀以南略取
作昆明還報命而太史公留滯周南發憤
且卒卒三歲而子長爲太史令紬史記經
室金匱之書十年而遭李陵之禍幽于縲
綆旣被刑之後復爲中書令尊寵任職故
任安與書責以古

及班固漢書列傳具載相同竊謂子長游
覽山川在弱冠之年席猶未煖豈便有侍
姬相隨夫伶玄撰趙飛燕外傳其自敘全
以樊通德立案中稱通德沾袖顧眄燭影
以手擁髻悽然泣下一段情語千載如畫
何子長自敘中略不及清娛隻字且後來
奉使西蜀遭甌陷刑以迫于死不下三三
十年事其能竟置清娛于同州不之顧乎

當其下蠶室時清娛即宜憤死何待後來
令人甚疑此碑文不知金石錄諸書曾略
載其事及遂良文否不應以龍門令饒姬
之芳名既磨滅于千百年前待褚學士而
銘其幽矣彼貞觀文人謂宜同轂而詠歌
其事何以復埋沒于千百年後即褚公翰
墨膾炙士林豈其至于今日始流傳人間
吾將起漢唐諸公于九京而問之矣

山人高士

夫所謂山人高士者必餐芝茹薇盟鷗狎
鹿之儔而後可以稱其名耳今也一概溷
稱出于何典詞客稱山人文士稱山人徵
君通儒稱山人喜游子弟亦稱山人說客
辯卿謀臣策士亦稱山人地形曰者醫相
訟師亦稱山人甚者公卿大夫棄其封爵
而署山人爲別號其義云何今婁江諸士

子爲人題扇徃徃自署曰山人某尤可絕
倒此則弁州公作法于涼後來轉相傾慕
唐開元初有薦山人于朝者并獻其文卷
玢判之曰觀其良宰論頗涉佞諛山人當
極言讜議豈宜偷合苟容不許奏此真秉
占快事矣吳中張伯起著山人歌猶龍爭
蛟山人挂枝兒欽愚公序葛太學詩直詆
山人爲大盜爲乞兒近有以口舌賈旣者

至使縣大夫署假山人于械上又傳之爰
書中污莫大焉如此而山人之名尚可居
耶然南朝戴顓高卧牖下以山人之服加
其身孔珪謂衡陽王曰殿下處朱門游紫
闥誰得與山人交耶要亦在彼兩君子稱
之始無媿色夫唐以少室山人爲左拾遺
如李渤盧鴻壹輩豈多見哉若盧藏用終
南捷徑便已取譏于當世矣我明初猶

有以纁壁起家者 世廟而後蒲輪鶴謚
杳然亾聞何爲無其實而掩其名耶至于
高士之署尤爲不倫歷觀史籍傳隱逸傳
文苑傳儒林初未嘗無分別何爲訛謬之
相承至于此晉皇甫謐撰高士傳九十餘
人夷齊兩龔皆不錄今之高士如林談何
容易凡在吾黨得不亾明耻之乎夷考古
人亦謙讓其名晉孟少孤嘗曰億兆之人

無官者十居其九豈皆高士哉我疾病不堪恭命非敢爲高也南宋江湛舉王微爲吏部郎微與從弟僧綽書曰江不過彊吹拂吾云是巖穴人巖穴人情所高吾得當此則雞鶩變作鳳皇何爲干飾廉隅秩秩見干面目所惜者大耳夫奇士必龍麝深藏與蛙蝦爲伍於勲其猶難之林宗輩不足識也如此韵味今人所無按晉紀武帝

以處士馮恢爲散騎侍郎張華曰臣請觀之若不見臣上也見而有傲世之榮次也次而爲賓主者固俗士也及華至恢待之恭于是時人少之唐杜牧有送薛處士序云處士之名何哉潛山隱市皆處士也蓋有大智不得大用故羞耻不出寧反與市人木石伍也非大君子其孰當之據此則今之世即處士之名已不足以當之矣